

**Lita Nampa 1 Peterlu
Walkatjunkunytja
1 Peter
Nyangatja Nganmanytju
Nyakula Wangkanytjaku**

Nyangatja Godaku tjukurpa Peterlu walkatjunkunytja. Paluru lita kutjara walkatjunu, ka nyangatja lita nampa 1 paluru walkatjura iyantja Jesuku walytja tjutakutu ngura kutjupa tjutangka nyinanyangka. Paluru tjana panya ngaltutjara nyinangi panya anangu kutjupa tjutanku tjananya rawanku kuraningi munu pikantanangi tjana Jesunya wanannyangka. Kutjupa tjaraya tjailangka tjarpatjunangi. Ka Peterlu lita nyangatja tjanampa walkatjunu tjananya kunpuntjikitjangku tjana Godaku rapa pukulpa nyinanytjaku kurannyangka tjituru-tjitururira wantinytja wiya.

Munu paluru tjanala tjukurpa tjakultjunangi Jesunyatjara panya paluru kunpu pulka mulapa ngaranyi munu anangu tjuta wankarunkupai tjana palumpa mulamularingkunyangka. Munu Peterlu tjananya wangkangi Godala wanganarangku kulira tjukaruru nyinanytjaku munu pukulpa kalypa wirura nyinanytjaku mukulya alatjitu. Panya Jesunya kuwari nguwanpa malaku pitjanyi nyuntunya nganananya mantjintjikitja.

Tjukurpa nyanganpa ngarinyi:

- 1:1-2 Peterlu nganmanytju wangkanytja
 1:3-12 Godalu palumpa walytja tjuṭa
 witulya pulkangku atunymara
 kanyintja ngula Tjintu Malatjangka
 wankarunkunytjikitjangku
 1:13—2:10 Godalulanya mantjinu palya mu-
 lapa nyinanytjaku kura tjuṭa wantira
 2:11 —3:7 Jesunya purunypa mayatja
 tjuṭangka wanganarangku kulintjaku
 3:1-7 Wati minyma kurirara wirura palyanyku
 nyinanytjaku
 3:8 —4:19 Kutjupangku nyuranya kuran-
 nyangkaya uti Godaku mulamularingama
 munu rawa palyanyku nyinama
 5:1-11 Peterlu wangkanytja Jesuku walytjapiti
 atunymankupai tjuṭangka
 5:12-14 Peterlu tjukurpa malatja wangkanytja

Peterlu Nganmanytju Wangkanytja

¹ Uwa, Jesuku walytja tjuṭa, ngayuluna
 Peternya Jesuku Christaku tjukurtjara panya
 paluruni witura iyanu tjukurpa palumpa
 anangu tjuṭangka wangkanytjaku. Kana lita
 nyangatja nyurampa walkatjunanyi Jesuku
 walytja tjuṭaku. Panya nyuranya Godalu
 ngurkantanu palumpa walytja nyinanytjaku.
 Palu panya anangu tjuṭangku nyuranya
 rawangku kurara pungknyangka nyura ngura
 walytja wantikatira ngura malikitja tjuṭakutu
 anu Puntula, Kalaitjiyala, Kapatu-tjiyala, Aitjala
 munu ngura panya Pitjiniyala tjanalakutu.
 Kana nyangatja palulanguru nyurampa

lita walkatjunanyi. ² Panya Mama Godalu nyuranya nganmanytju kulintjatjanungku ngurkantanu palumparinytjaku, ka panya Kurunpa Milmiltu nyuranya palyanu palumpa walytjaringkunyjtaku. Ka nyara palulanguru Godaku walytjaringkula nyura Jesula Christala wanganarangku kulini munu nyura Godala kalypa nyinanyi, panya Jesunya nyurampa ngalkilpa ilura milkali tjutingu, ka milkali nyara paluru tjutinytjitjangka Godalu nyuranya kalypangku pungguwiyangku wantingu.

Ka Godalu nyuranya titutjarangku mukulyangku kanyinma munu nyuranya kurunpa rapara pukulmanama.

Mantangka Nyangaya Nyuranya Kurara Punganyi Palu Godalu Wiru Mulapa Nyurampa Ilkaringka Kanyini

³ Uwa, mirawanimala Godanya Mayatja Jesuku Christaku Mama, panya ngaltunytju pulkangkulanya palumpa walytjaringkunyjtaku palyanu, palumpa katja Jesunya Christanya ilunyangka wankara pakaltjingara. Kala nyara palulanguru nganana pukulpa rapa pulka nyinanyi ilunytja kulira nguluringkunyjtaja wiya.

⁴ Munula pukultu kulini panya Godalu pulka mulapa kanyini nganannya ungkunyjtikitjangku. Paluru ngura ilkaritjangka nganampa kanyini, panya ngura nyara palula wiru mulapa titutjara ngarapai, wiyaringkupai wiya, ka kutjupangku putu alatjitu kuralku. ⁵ Panya nganana Godaku mulamularingkunyangka paluru witulya pulkangku

nganananya atunymara kanyini ngula Tjintu Malatjangka wankarunkunytjikitjangku. ⁶ Ka nyura ara nyanga palunya kulira pulkara pukularinyi. Kuwari nyura tjinguru tjituru-tjitururipai kura kutjupa kutjupa tjuta nyurala wirkankunyangka, palu nyanga palunya tjananya nyura kulilwiyangku wantira waintara kulini panya paluru nyuranya ngula wankarunkuku. Palulanguru nyura kuwari pukulpa titutjara nyinanyi. ⁷ Panya tjituru-tjituru nyurala wirkankunyangka Godalu nyanganyi munu kulini alatji, “Tjinguruya ngayuku mulamularinganyitu munta tjinguruya ngayuku watarkuringu.” Palu tjituru-tjituru pulka nyurala wirkankunyangka nyura kulilwiyangku wantira palumpa kutju mulamularingkunyangka Godanya pulkara pukularinyi munu kulini, “Mulapaya nyanganpa ngayuku mulamularinganyi watarkurinytja wiya.”

Uwa, Godaku mulamularingkunytjaku wiru mulapa ngaranya. Panya manta winkingka anangu tjutangku mani kutju pulkara kulilpai, palu mani nyaratja unytju ngarapai, kaya ngula mani wiyaringkunyangka palunya kulintja wiyaringanyi, palu wiru mulapa nyangatja Godaku mulamularingkunytja. Ka palulanguru nyuranya ngula pulkara mirawanira palyanmankuku Mayatja Jesunya malaku pitjanytja-arangka. ⁸⁻⁹ Nyura panya Jesunya nyakunytja wiya, palu nyura palumpa pulkara mukuringanyi. Munu nyura kuwari kulu nyakunytja wiya, palu nyura

palumpa titutjara alatjitu mulamularinganyi, munu nyura kurunpa winki pukulpa pulka nyinanyi, panya Godalu nyuranya rawa mulamularingkunyangka wankaru kanyini.

¹⁰ Nyanga palunya panya wati Godaku wangkatjara tjutangku nganmanytju iriti walkatjunangi. Palu tjana putu kuliningi, “Yaaltjingara Godalu mukulyangku anangu tjuta wankarunkunytjikitjangku kulini?” Munuya palulanguru rawangku pulkara kuliningi Godalu tjanala wangkanyangka. ¹¹ Panya Christaku Kuruntu tjanala unngunguru tjakultjunangi alatji, “Ngula Christanya Wankarunkupainya Godalu kalkuntjanya pitjanyangkaya palunya pulkara pikatjaralku munuya iluntankuku. Ka nyara palula malangka Mama Godalu palulawanungku wiru mulapa palyalku anangu tjuta pukulmankunytjikitjangku.” Kaya palulanguru wangkatjara tjutangku rawangku kuliningi alatji, “Yaaltjingara Godalu anangu tjuta wankarunkuku? Yaalara paluru tjananya wankarunkuku?” Alatjiya rawangku kulira aritiringi.

¹² Palu Godalu tjanala wangkangu alatji, “Tjukurpa nyanga nyura kuwari wangkanytja kuwari utiringkunyitja wiya, palu ngula mulapa kutju utiringkuku anangu malatja malatja tjutangku nyakunytjaku.” Ala nyangatja, tjana iriti tjukurpa Godaku tjakultjunangi nyura malatja tjutangku kuwari utiringkunyangka nyakunytjaku. Panya kuwari Godalu Kurunpa Milmilnga ilkaringuru iyanu tjukurtjara tjuta witulyankunytjaku, kaya paluru witulyankun-

yangka nyurala Tjukurpa Palya Jesunyatjara tjakultjunu tjukurpa wiru mulapa. Ka panya angelpa tjuṭa kulu mukuringanyi tjukurpa nyanga palunya kulira nintiringkunyjtikitja, palu putuya kulini.

Godalulanya Mantjinu Palya Mulapa Nyinanytjaku

¹³ Palulanguruya kulil-kulilpa nyinama Godala wanganarangku kulira palyantjikitja. Munuya watarku nyinawiyangku pukultu ala-alangku patara kulinma panya ngula Jesunya Christanya malaku pitjanyangka Godalu mukulya pulkangku nyurampa wiru mulapa palyalku.

¹⁴ Panya nganmanypa nyura ngurpa nyinangi munu nyura kura tjuṭaku kutju mukuringangi. Palu kuwari nyanga nyura uti kura tjuṭa wantira Godala kutju wanganarangku kulira palyanma.

¹⁵ Panya Godanya palya mulapa nyinanyi. Ka palulanguru nyura uti palu purunypatu nyinama palya mulapa, panya Godalu nyuranya ngurkantanu palumpa walytja nyinanytjaku.

¹⁶ Nyanga alatji nyiringka iriti walkatjunkunyjtja ngaranyi Godalu wangkanytja,

“Palya mulapaya nyinama. Nyanga ngayulu palya mulapa nyinanyi, palu purunypaya nyinama.” *

¹⁷ Nyura panya Godala tjapira palunya mamamara walkulpai. Nyaratja palya, palu watarkurinytja wiyangkuya kulinma panya paluru anangu tjuṭa tjukarurungku ngurkantankupaitu nyinanyi. Panya

* **1:16** Leviticus 11:44-45

paluru anangu uwankara tjungu nyanganyi ngurkantankunytjikitjangku, nyuranya kulu. Munu paluru wiru palyannyangka nyakula palyanmananyi munu kura palyannyangka nyakula kuranmananyi. Palulanguru nyura uti mantangka nyanga unytju nyinaralpi Godalawanu nyinama palunya kutju rawangku mayatjanmara walkura. ¹⁸⁻¹⁹ Nyura panya tjamuku arangka nganmanypa nyinangi, palu ara nyara palulawanu nyinara nyura iwara kura putu wantikatingi. Ka panya kuwari nyuranya Godalu iwara kurangka ngaranyangka mantjira iwara palyangka tjunu palumpa walytjaringkunytjaku.

Palu kulilaya, yaaltji-yaaltjingu Godalu nyuranya kurangka ngaranyangka mantjinu munu wankarunu? Paluru wanyu mani pulka ungkula nyuranya mantjinu? Wiya, panya mani mantatja kutju unytju ngarala wiyaringkupai. Palu panya Godalu nyuranya mantjinu Jesula Christalawanungku panya paluru punu katakutjarangka milkali tjutinytjitjanguru. Nyara paluru panya lamalama wiru mulapa ungkunytja purunypa, panya wati tjukurtjarangku nganampa kuranguru lamalama pungkula Godanya ungkupai palunya pukulmankunytjikitjangku, nyara palu purunypa Jesunya nganampa lamalama wiru mulapa ngalkilpa ilungu Godalu nganannya kura tjuṭa palyantjitjanguru kalypangku pungkuiwangku wantinytjaku. Jesunya milkali tjutinytjitjanguru Godalu wiru mulapa nganampa palyanu nganana

iwara kuranguru karalyarira iwara palyangka ankunytjaku Godaku walytja mulapa.

²⁰ Panya nganmanytju manta ilkari paluntja kuwaripangka Godalu kuliningi Christanya mantakutu iyantjikitjangku nyuntunya nganannya wankarunkunytjaku. Ka mulapa tu paluru pitjala nganampa ngalkilpa anga-ilungu. ²¹ Ka nganana palulanguru Godaku mulamularinganyi, panya paluru alatjitu Christanya ilunyangka wankara pakaltjinganu munu panya palunya ngura ilkaritjangka tjunu mayatja pulka nyinanytjaku palula itingka. Ka nyara palulangurulta nganana mulapa Godaku mulamularinganyi munula palumpa ala-alangku patara kulil-kulilpa nyinanyi, watarkurinytja wiya.

Godalu Altinyangka Palula Wanganarangku Kulintjaku

²² Uwa, nyura panya tjukurpa tjukururu Jesunyatjara wanganarangku kulintjatjanungku kura tjuta wantira palya mulapa nyinanyi munu nyura kuwari Jesuku walytja tjutaku pulkara mukuringanyi. Nyanga palulanguru nyuranku uti titutjara pulkara mukuringama kurunpa winki. ²³ Panya nyura Godaku katja untalpa nyinanyi palumpa panya tjukurpa kulira mulamularingkunytjatjanu. Panya tjukurpa nyara paluru kurunpa pampulpai munu titutjara ngarapai wiyaringkunytja wiya. Ka tjukurpa palumpa mulamularingkunyangka Godalu nyuranya katjanmara untalpanmanu. Nyura

nganmanypa iti ngaringi mamanguru ngunytjunguru, ka puntu nyara paluru wiyaringkupai. Palu kuwari Godanya nyurampa mama nyinanyi titutjara nyinapainya, ka nyura kulu palu purunypa titutjara wanka nyinaku.

²⁴⁻²⁵ Panya nyiringka nganmanytju walkatjunkunytja ngaranyi nyanga alatji, “Tjanpi panya rawa wanka ngaranytja wiya mapalku piltiringkupai, munu inuntji kulu unytju wiru ngarala punkara wiyaringkupai.

Ka nyara palu purunypa anangu uwankara rawa nyinanytja wiya ilupai.

Palu Mayatja Godaku tjukurpa wiyaringkunytja wiya titutjara alatjitu ngaraku.” *

Ka panyala tjukurpa nyanga wiru palunya nyurala nganmanytju tjakultjunu.

2

¹ Nyanga palulanguruya kura tjuta palyalwiyangku wantima. Munuya ngunti wangkawiyangku wantima, ngunti palyapalku nyinawiyangku wantima, munuya kutjupangku wirura palyannyangka nyakula nyararingkunytja wiyangku wantima, munuya kampangkatu tjaalymara anangu kutjupa wangkawiyangku wantira wirura nyinama.

² Munuyanku kurunpa winki Godaku tjukurku mukuringkula nintiringama, panya iti kulunytju ipiku pulkara mukuringkula rawangku tjikilpai, palu purunypaya Godaku tjukurku

* **1:24-25** Aitjayaku 40:6-8

mukuringama. Panya it̄i kulunytju rawangku ipi tjikira pulkaringkupai munu wirura wanka nyinapai, palu purunytjuya Godaku tjukurpa rawangku kulira nintiringama, ka nyuranya Godalu wankaru titutjarangku kanyilku. ³ Panya mulapa nyura nganmanypa nintiringu Mayatja Jesunya ngaltunytju pulka mulapa nyinanytjita kulira.

Jesulakutu Ilaringkunytjaku

⁴ Uwa, Mayatja Jesulakutuya ilariwa, panya paluru puli purunypa nyinanyi palu wanka. Panya anangu tjutangkuya palunya kura-palku wantingi, palu Godalu palunya ngurkantanu wiru mulapa uwankarangka waintarinytja. ⁵ Panya paluru nyuranya Mayatja Jesulakutu pitjanyangka mantjira palula tjungura kanyilku, panya wali palyalpai tjutangku puli tjuta tjunkula tatilpai wali wiru palyantjikitjangku, nyara palu purunypa nyura Jesulakutu pitjanyangka Kurunpa Milmiltu nyuranya palula tjungura utulu kutju palyani wali wiru purunypa nyura uwankara tjukurtjararingkula Godala mirangka tjukaruru wiru mulapa ngaranytjaku. Munu nyura uwankarangka tjukurtjararingkula Godanya pukultu walkura mirawanipai. Ka paluru pulkara pukularipai nyura Jesuku Christaku mulamularingkula walkunnyangka. ⁶ Panya nyiringka iriti walkatjungkunytja ngaranyi Godalu wangkanytja nyanga alatji,

“Ngayulu puli tjiwa wiru mulapa ngurkantara tjunanyi kuunangka wali panya Tjayannga kunpu mulapa palyantjikitjangku.

Ka anangu kutjupa palumpa mulamularingkulampa Godala mirangka kuntaringkuwiya rapa alatjitu ngaraku.”
*

7 Uwa, puli nyara paluru panya Mayatja Jesunya, ka nyura palumpa mulamularingkupai tjuta ninti panya paluru wiru mulapa. Kaya palumpa putu mulamularingkupai tjutangku palunya kura-palku kulilpai. Panya iriti nyiringka walkatjunkunytja ngaranyi nyanga alatji,

“Wali palyalpai tjutangkuya wali puli tjutanguru palyaningi,
munuya puli kutju nyakula waningu kura-palku kulira.

Palu nguntiya waningu, panya puli nyara paluru kura wiya, wiru mulapa wali kunpu ngaranytjaku kanyilpai.” *

8 Ka tjukurpa kutjupa kulu iriti nyiringka walkatjunkunytja ngaranyi nyanga alatji,

“Anangu tjuta puli nyanga palulawanu ankunyangka puli paluru tjananya tarpipungkula mantangka punkatjingalpai.” *

Alatji nyiringka iriti walkatjunu, ka puli paluru Jesunya, panya kuwaripatjara Godalu kutjupa kutjupa uwankara paluntja kuwaripangka paluru mukuringu anangu tjuta Jesuku Christaku mulamularingkunytjaku. Munu

* 2:6 Aitjayaku 28:16 * 2:7 Psalm 118:22 * 2:8 Aitjayaku 8:14

palulanguru piruku kulinu, “Palu anangu kutjupa tjuṭangkuya Tjukurpa Palya Jesuku kulira wantiku, munuya palulangurulta ngayulanguru titutjara alatjitu paṭu nyinaku.” Nyanga alatji Godalu nganmanytju kulinigi, ka panya palumpa wangkatjarangku nyiringka iriti walkatjunu tjukurpa nyanga pulitjara.

⁹ Palu Godalu panya nyuranya ngurkantara tjunu palumpa walytjapitiringkula nyinanytjaku palya mulapa, ka nyura uwankara palumpa tjukurtjara tjuṭa nyinanyi, Mayatja panya pulkaku. Panya paluru alatjitu nyuranya uwankara ngurkantara tjunu anangu tjuṭangka tjakultjungkunytjaku paluru wiru tjuṭa palyantjitja. Panya Godalu nyuranya ngurkantanu mungawalurungka nyinanyangka kura wantira palula tjunguringkula nyinanytjaku tili wiru mulata. ¹⁰ Nganmanypa panya nyura mungutja purunypa nyinangi. Palu kuwari nyanga nyura palumpa walytjapiti mulapa nyinanyi. Nganmanypa panya nyura ngurpa nyinangi, palu kuwari nyanga nyura nintiringu panya paluru nyuranya ngaltunytju pulkangku atunymara kanyini.

Jesuku Walytja Wiya Tjuṭangka Palyanyku Nyinanytjaku

¹¹ Uwa walytja wiru tjuṭa, panya nyura mantangka nyanga unytju kutju nyinanyi malikitja purunypa, palu ngula nyura ngura ilkaritjangka wirkara ngurararira nyinaku. Palulanguruna pulkara nyuranya wituwituni, “Kulintja kura nyurala unngu utiringkunyangkampaya kura

palyantjikitjangku kulintja wiyangku wantima. Panya kulintja kura nyanga paluru tjana nyuranya rawangku mukumukuni kuraringkuntjaku, kaya palula-tawara kulintja palunya tjananya wantima kulintja wiyangku.”¹² Panya Jesuku walytja wiya tjutaya ngura winkingka nyurala tjungu nyinara-waninyi munu nyuranya kutjupa kutjupa palyannyangka nyakula tjinguru kuranmankuku. Palula-tawaraya palya kutju tjukarurungku palyanma, kaya palulangurulta nyuranya wiru palyannyangka nyakula Godanya walkulku tjintu nyara palula panya Jesunya malaku pitjanytja-arangka.

Mayatja Tjutangka Wanganarangku Kulintjaku

¹³⁻¹⁴ Uwa, Mayatja Jesunya mukuringanyi nyura palumpa walytja uwankara mantangka nyanga nyinara mayatja mantatja tjutangka wanganarangku kulintjaku. Panya mayatja pulka nyinanyi ngura ini Rome-ala ngura tjutaku mayatja munu mayatja nyara paluru wati tjuta iyanu ngura kutjungka kutjungka mayatarira kanyintjaku, anangu kura palyalpai tjuta pungkuntjaku munu wiru palyalpai tjuta pukularira mirawaninytjaku. Ka nyura uti mayatja nyanga paluru tjana wangkanyangka wanganarangku kulira palyanma.¹⁵ Panya anangu ngunti wangkapai tjutanku nyuranya puntura wangkapai Godaku panya ngurpangku. Palu Godanya mukuringanyi nyura tjukaruru palyanyku nyinanytjaku. Panya nyara palulanguruya nyura tjukaruru wirura nyinanyangka nyakula ngunti

wangkapai paluru tjana putu kulilku nyuranya puntura wangkanytjikitjangku.

16 Uwa, rawangkuya wiru tjuta kutju palyanma Godaku, panya paluru nyuranya palumpa warakarinytjaku pauntjingara wituwitulpai wiya puritjina purunypa. Palu nyura panya palula wanganarangku kulilpai pukularira, Christala tjungu nyinara. Palu tjinguru nyura ngunti kulilku alatji, “Nganana Jesuku walytja nyinanyangka kutjupangku nganananya puritjina purunypa putu pauntjingara wituwituni. Wanyula unytjungku kutjupa kutjupa kura palyanma.” Palu wiya, nyanga alatji kulintja wiyangkuya wantima panya nyura Godaku warakaripai tjuta munu nyura uti palulawanu tjukaruru nyinama.

17 Munu nyura uti anangu uwankarangka purkarangku wirura wangkama pauntjingantja wiyangku. Munuya Jesuku walytja uwankaraku pulkara mukuringama wantinytja wiya. Munuya kulinma Godanya panya pulka mulapa nyinanyi nganana ngalypa-ngalyparingkunyitjaku wiya. Ka panya mayatja pulka nyara Rome-ala nyinanyi, pala palulaya wanganarangku tu kulinma kuraringkula wantinytja wiyangku.

18 Kana kuwari nyanga nyurala wangkanyi wati warakaripai tjutangka. Uti nyura nyurampa mayatjanga wanganarangku kulira warka palyanma. Tjinguru nyura kutjupa tjuta mayatja wirungka warakarinyi panya paluru nyuranya ngaltunytjungku mukulyangku wirura kanyini. Ka tjinguru nyura kutjupatjara mayatja

kurangka warakarinyi, ka nyuranya tjinguru mirpantjungku pauntjingara wangkanyi. Palu uti nyura mayatja uwankarangka tu wirura wanganarangku kulinma panya mayatja mukulyangka kutju wiya, palu mayatja mirpantjungka kulu.

¹⁹ Tjinguru nyurampa mayatjangku nyuranya mirpanarira pungkuku wiyanguru alatjitu, ka nyura uti Godanya kulira mirpanariwiya wirura rawa warakarima, ka Godanya nyakula nyurampa pukulariku. ²⁰ Palu tjinguru nyurampa mayatjangku nyuranya kura palyan-

nyangka pungkuku. Nyaratja palya, panya nyurampa kuranguru paluru nyuranya punganyi. Ka nyuranku uti mirawaniiwiyangku wantima panya Godanya kura palyannyangka nyurampa pukularinytja wiya. Palu wiyanguru pungkunyangkaya mirpanariwiya rawatu warakarima, ka pala palulanguru Godalu nyuranya nyakula palyanmankuku.

²¹ Panya Jesulu Christalu nyurampa ngalkiltu pika pulka mantjinu nyura palunya ngapartji arkantjaku. Panya Godalu nyuranya ngurkantanu Jesunya purunypa ara nyanga pikawanu nyinanytjaku. ²² Panya paluru kura palyantja wiya alatjitu, munu ngunti kulu wangkanytja wiya ngarangi. ²³ Ka tjana anara kurara pungkunyangka paluru ngapartji wangkanytja wiya, munu pungkunyangka ngapartji pungkunytjikitjangku wangkanytja wiyatu. Paluru wantingi Godalu kutjungku tjananya ngula ngurkantara tjarantjaku, panya paluru tjukarurungku ngurkantankupai. ²⁴ Palu

Jesunya panya nganampa kuranguru punu katakutjarangka ilungu nganampa ngalkilpa, nganaña kura wantira Godalawanu tjukaruru nyinanytjaku. Uwa, Jesulu nganampa ngalkiltu pika pulka mantjinu nganaña nganampa kuranguru wankaringkunyitjaku. ²⁵ Panya tjiipi purunypa nyura kawankatingu. Palu kuwari nyanga nyuranya Godalu malakungku arurilyira ngalya-katingu, ka Jesulu Christalu tjapata palyangku nyuranya rawangku atunytju kanyini.

3

Kurirara Mukulya Wanganara Nyinanytjaku

¹⁻² Uwa, kana kuwari palu purunypatu nyurala wangkanyi minyma kuritjara tjutangka. Uti nyura wati kuringka wanganarangku kulinma. Tjinguru nyuntumpa kuringku Godaku tjukurpa kulilpai wiya, palu nyuntu wirura nyinanyangka nyakula paluru tjinguru ngula Jesuku mulamularingkuku. Palu nyuntu palunya rawangku wangkara wituwituntja wiyangku wantima, panya nyuntu wirura tjukaruru nyinanyangka kutju wati paluru nyuntunya nyakula tjinguru Godaku mulamularingkuku. ³ Panya minyma kutjupa tjutangkuya wiru mulapa nyinanytjikitjangku mangka rawangku kumamilara wirulpai kutjupa kutjupa wiru tjuta tjunkula, munuya liritja manyirkitja kulu tjunkupai goldnguru palyantja. Munuya mantara wirungka tjarpapai mani pulkatjangka, munuya kulilpai, “Nyanga alatji palyarala wiru mulapa

ngaranyi.” Palu nyura uti alatji kulilwiyangku wantima, panya nyanga palula tjanalanguru nyura wiruringkupai wiya.

⁴ Palu nyura titutjara wiru mulapa nyinanytjikitja mukuringkulampa nyuranku kurunpa mukulya pulkatjara nyinama munuya pukultju piluntju nyinama mirpanarinytja wiya. Ka Godalu nyuranya mukulya winki nyinanyangka nyakula pulkara pukulariku, panya Godalu unngutja nyakupai munu nyara palulanguru kurunpa pukultju piluntju nyinanyangka nyakula pukularipai. ⁵ Panya iriti mulapa minyama Godaku mulamularingkupai tjuta nyanga alatji nyinangi kurunpa pukultju piluntju, munuya tjanampa kuri tjutangka wanganarangku kuliningi. Nyanga palulanguruya wiru mulapa nyinangi, mantara kutjupa kutjupa tjuta tjana kanyintjitjanguru wiya.

⁶ Palu minyama Tjiiranya kulinma wati panya Aipuramaku kuri, panya paluru palu purunypa nyinangi munu palumpa kuringka wanganarangku kuliningi munu palunya mayatja kulira walkuningi. Ka nyura Tjiiranya purunypa nyinanytjikitja mukuringkulampa wirura palyanyku nyinama munu titutjara rapa nyinama nguluringkunyitja wiya.

⁷ Uwa, ka wati tjuta nyura uti minyama kuri tjuta mukulyangku wirura kanyinma tjanampa kuraringkunyitja wiyangku, panya minyama tjuta upa nguwanpa wati purunypa kunpu nyinanytja wiya. Panya Godalu wati tjuta kutju wankarunkunyitja wiya minyama

tjuṭa kulu wankarunkuku wanka tiṭutjara nyinanytjaku. Tjinguru watingku minyma kuri pungkuku munu tjinguru paluru Godala tjapintjikitja mukuringkuku, ka Godalu palunya kulintja wiyangku wantiku. Palula-tawarayanku minyma kuringka wirura tjungu nyinama.

Nyuranya Kurannyangka Kulira Wantinytjaku

⁸ Kaṇa nyangatja nyura uwankarangku kulintjakulta wangkanyi. Kaya kulinma, munuyanku tjungu kalypa nyinama mukulya pulkatjara, panya kuta malanyku pulkara mukuringkupai, palu purunypayanku mukulya nyinama. Munuyanku kaṇanykaṇanypa wiyangku ngaltunytjungku tjananya kanyinma. ⁹ Tjinguru kutjupangku nyuranya kurannyangka nyura ngapartji tjananya kuraṅtja wiyangku wantima. Ka tjinguru kutjupangku nyuranya pauntjingara warkiku, ka nyura ngapartji palu purunymankuwiyangku wantima. Palu mukulyangkuya tjananya wangkama munuya Godala tjanampa tjapinma tjananya wirura kanyintjaku. Panya Godalu nyuranya ngurkantanu munu nyuranya pukulmankunytjikitjangku kalkunu, ka nyura ngapartji uti palulanguru anangu kutjupa tjuṭa pukulmanama. ¹⁰ Panya nyiringka iriti walkatjunkunytja ngaranyi alatji,

“Nyura pukulpa wirura nyinanytjikitja mukuringkulampaya kura tjuṭa wangkawiyangku wantima, munuyanku ngunti wangkanytja wiyangku tjukarurungku kutju wangkama.

11 Munuya kura tjuṭa wantira kampa kutjuparira wiru tjuṭa kutju palyanma, munuya kurunpa winkingku kulinma uwankaraku kalypa nyinanytjikitjangku.

12 Panya Godalu tjukaruru nyinapai tjuṭa atunymara kanyilpai, munu palula tjapinnyangka tjananya wanganrangku kulilpai.

Palu paluru kura palyalpai tjuṭa kulilwiyangku wantipai.” *

13 Tjinguru nyura kurunpa winki mukuringanyi wirura nyinanytjikitja, ka nyara palulanguru palyanyku nyinanyangka anangu kutjupangku nyuranya kurantjikitjangku kulintjatjanungku puṭu kulira wantiku. 14 Palu tjinguru nyura tjukaruru nyinanyangka kutjupa tjuṭangku nyuranya rawangku wangkara kuranma. Palu tjanampa nguluringkula tjituru-tjitururinytja wiyangkuya wantima, panya Godalu nyuranya pukulmara kanyilku kura pala palula tjanalanguru. Ka tjananya kulira wantima. 15 Munuya Jesunya Christanya kurunpa winkingku mayatjanmara walkunma.

Ka tjinguru kutjupa tjuṭangku nyuranya tjapilku, “Nyaaku nyura Jesuku pukulpa mulamularinganyi?” Ka nyura nganmanytju kulintjatjanungku alatji tjapinnyangka ngulu wiyangku palula tjanala utingku tjakultjunama tjana kulintjaku Jesunya panya nganampa mayatja munu wankarunkupainya. Palu tjanala

* 3:12 Psalm 34:12-16

kanany-kananytju wangkanytja wiyangkuya purkarangku wangkama mukulyangku.

¹⁶ Uwa, tjana nyuranya anannyangka tjanampa pikaringkunyitja wiyangku wantima, panya Godalu pikaringkunyaangka nyakula nyurampa pukularinytja wiya, ka nyura kulira kuntarangkuku. Palulanguruya tjanala purkarangku wirura wangkama, kaya nyuranya anantjatjanungku mala kuntarangkuku nyuranya Christalawanu wirura nyinanyangka nyakula. ¹⁷ Tjinguruya nyuranya punganyi nyura tjananya kurannyangka palatja palya panya nyurampa kuranguruya nyuranya punganyi. Palu tjinguruya nyuranya wirura tjukaruru nyinanyangka punganyi, ka nyara palulanguru Godanya nyurampa nyakula pulkara pukularinyi, panya nyura palula wanganarangku kulira wirura nyinanyi, kaya ngunti nyuranya punganyi.

¹⁸ Wanyuya Jesunya Christanya kulinma, panya paluru kura wiya alatjitu tjukaruru mulapa munu panya nganampa ngalkilpa anga-ilungu kura palyalpai tjutaku nganannya Godala junguntjikitja. Paluru nyuntumpa nganampa kuranguru ilungu kutju-ara Godanya nganampa kalyparingkunyitjaku. Paluru anangu alatjitu ilungu, palu Kurunpa Milmitu palunya ilunyangka wankara pakaltjingu. ¹⁹ Ka paluru kurunpa anu ngura kutjupakutu munu kurun-kurunpa tjutangka tjukurpa wangkangi, panya ngura nyara palula Godalu palunya tjananya tjailangka purunypa kanyini. ²⁰ Panya paluru tjana iriti Godala tungunpungangi Noah-lu

panya pauta pulka palyantja-arangka, ka panya Godalu tjananya uru pulkangka uwankara iluntanu munu tjananya kurunpa tjuṭa tjailangka purunypa tjunu rawa nyinanytjaku. Nyara palula arangka Noah-lu pauta rawangku palyalkatinyangka Godanya anangu tjuṭaku pataningi paluru tjana malaku palulakutu aruringkunyntjaku, palu tjana wantingi. Kaya Noah-nya tjana anangu 8 kutju pautangka tjarpara wankaringu Godalu uru panya pulkangka katura katinyangka.

²¹ Ka palu purunypa kuwari Godalu nganananya wankarunanyi. Panya anangu kutjupa minangka baptisekatinyangkala nyakula kulilpai palunya Godalu wankarunkunyntja. Palu nganananya nyaaku minangka baptise-katipai? Miri paltjira raputji kilinankunyntjaku? Wiya, nganana Godala tjapilpai paluru nganananya palula mirangka kunṭa wiya ngaratjunkunyntjaku. Ka mulapaṭu Godalu nganananya baptisekatinyangka alatjingalpai, panya paluru Jesunya Christanya ilunyangka wankara pakaltjinganu, nyara palulanguru Godalu nganananya wankarunkupai. ²² Ka panya Jesunya pakantjatjanu ngura ilkarikutu anu munu kuwari nyinanyi mayatja pulka mulapa Godala tjungu palula kampa wakungka, munu paluru mayatjarira kanyini ilkaritja kutjupa kutjupa uwankara, angelpa tjuṭa, mayatja kutjupa kutjupa tjuṭa kulukulu.

4

Kampa Kutjuparira Tjucaruru Nyinanytjaku

¹ Uwa, panya wati kura tjuṭangku Jesunya Christanya pulkara pungkula pikatjaranu mantangka nyanga nyinanyangkalpi, palu pungkunyaangka paluru rapa ngarangi Mama Godanya mukuringkunyjtjtja kutju kulira. Ka nyura uti palu purunytjutu kulinma munuya anangu tjuṭangku nyuranya pungkula pikatjarannyaangka rapa ngarama. Panya anangu kutjupangku Jesunya purunypa pikangka rapa ngarala Godanya pulkara kulilpai munu kura palyalpai wiya. ² Palulanguruya nyura mukuringkunyjtjtja wantima munuya Godala kutju wanganarangku kulira paluru mukuringkunyjtjtja kutju palyanma.

³ Panya nyura nganmanypa kurangka nyinangi Godaku ngurpa. Nyaratja nyura Godaku ngurpa nyinara kunṭa wiya anangu kutjupa kutjupangka ngaringi nyuranku mukuringkunyjtjtja kutju kulira. Munu nyura tjunguringkula waina pulka tjikira tarangkarira kutjupangka kutjupangka ngaripai kuri mulapa wantikatira. Munu panya nyura kurangu god ngalyapa ngalyapa tjuṭa walculpai nyinangi.

⁴⁻⁵ Palu kuwari nyanga nyura Jesuku walytjaringkula kura tjuṭa wantipairingu, kaya Godanya kulilpai wiya tjuṭangku nyuranya nyakula urulyarani, panya nyura tjanala tjunguringkula kura palyalpai wiyaringu. Kaya kuwari nyuranya anara kura tjuṭa wangkara ikaringkupai. Palu nyara palunya tjananya

ngula Godalu kuranyu ngaratjungkula wangkaku tjana mantangka nyinara palyantjitja uwankara utingku tjakultjungkunyjtaku. Panya paluru mulapa anangu uwankara ngurkantara tjaralku, wanka tjuta munu miri tjuta kulukulu. ⁶ Panya kutjupangku Tjukurpa Palya Jesunyatjara miri tjutangka kulu wangkara tjakultjunu tjana kulu kulira Godala tjunguringkula titutjara nyinanyjtaku. Paluru tjana panya nganmanypa ilura wiyaringu. Palu Godalu tjanala Tjukurpa Palya tjakultjungkunyjtaku iyanu tjana kulu kulira mulamularingkunyangka Kurunpa Milmiltu tjananya kulu wankarunkunyjtaku.

Ngapartji-ngapartjingku Atunymankunyjtaku

⁷ Ka tjintu ilaringu ilkari manta uwankara wiyaringkunyjtaku. Kaya purkarangku atatjura kulikatima tjukarurungku Godala tjapintjik-itjangku. ⁸ Palu pulka mulapa ngaranyi nyanga alatji uti nyuranku pulkara mulapa mukuringama kurunpa winki. Panya nyura anangu kutjupaku nganmanypa alatjitu pulkara mukuringkulampa palumpa mapalku kalyparingkuku nyara paluru nyuranya kurannyangka.

⁹ Ka tjinguru Jesuku walytja kutjupa malikitja ngura kutjupanguru pitjanyi kaya nyakulampa mapalkungku nyurampa ngurangka altira tjunama papulankuwiyangku, munu palunya pukultu kanyinma mirpanmirpanu wangkanytja wiyangku. ¹⁰ Panya Godalu nyuranya kutju kutju pukultjungku nintilpai munu witulyankupai warka walytjangku walytjangku palyantjaku. Ka

nyura uti war̄ka nyanga palunya tjananya nintinnyangka kutjungku kutjungku wir̄ura palyanma anangu kutjupa tjuṭangku kulū kunpuringkula pukultu Jesunya wanantjaku.

11 Tjinguru Godalu nyuntunya nintinu tjukurpa wangkanytjaku, ka nyuntu uti tjukurpa tjanala wangkarampa Godaku tjukurpa kutju wangkama. Tjinguru Godalu nyuntunya nintinu anangu tjuṭa alpamilantjaku, ka nyuntu uti tjananya pulkara alpamilanma, Godalu nyuntunya kunpunnyangka. Kaya nyara palulanguru anangu tjuṭangku nyuranya nyakula waintara Godanya pulkara mirawaniku munuya wangkaku, “Uwa, mulapa nyara paluru tjana Jesula Christalawanu tjukaruru mulapa nyinanyi.” Munuya nyara palulanguru Godanya pulkara walkulku. Uwa, Godanya panya mayatja witulya pulka mulapa nyinanyi pitalytji pulkana. Kala wanyu wantinytja wiyangku titutjarangku palunya mirawanira walkunma. Uwa, mulapa.

*Nyuranya Kurara Pungkunyangka
Pukularyntjaku*

12 Uwa walytja wiru tjuṭa, kuwari anangu Jesunya wantipai tjuṭangku nyuranya anani munu tjinguru punganyi munu kutjupa kutjupa palyani nyura pikatjararingkula tjituru-tjitururinytjaku. Ka nyura tjinguru tjituru-tjitururira kulini, “Yaaltji-yaaltjingku nyangantu nganannya kurani? Panya nganana Jesunya Christanya kutju wanalpai. Kalanya nyaaku nganannya kutju rawangku

kurani?” Palu alatji kulintja wiyangkuya wantima panya Godalu nyuranya arkara nyanganyi, “Yaaltji-yaaltji nyanga tjana kura nyanga tjuawanu kunpu ngaraku? Tjinguruya ngayunya wantinytja wiyanku titutjaranku wanama, munta tjinguruniya pakuringkula wantiku.” Alatji paluru nyuranya arkara nyanganyi panya paluru mukuringanyi nyura palunya titutjaranku tungun-tunguntu wanantjaku. ¹³ Palu pukularimaya kura nyanga palu purunypa nyurala wirkankunyangka. Panya nganmanytjuya Jesunya kuraringkula pungkula pikatjaranu munu iluntanu. Ka nyurampa ngapartji palu purunypatu ngarakatinyi. Kaya pukularima Jesunya purunypa pikatjararingkunyitjikitja. Panya ngula Jesunya Christanya malaku pitjaku witulya pitalytji pulka mulapa, ka nyara palula ara nyura pulkara pukulariku.

¹⁴ Panya anangu kutjupa tjutangku nyuranya Jesunya wanannyangka nyakula anara warkipai. Palu nyaanguruya nyuranya alatji wangkara warkinyi? Wiya, panya Godaku kurunpa nyurala unngu nyinanyi kurunpa panya wiru mulapa, kaya nyara palulanguru nyuranya anani. Kaya nyuranya warkinyangka kulira wantima munuya pukulpa nyinama. ¹⁵ Palu tjukaruruya palyanyku nyinama kura kutjupa kutjupa tjuta palyantja wiya. Panya nyuranya kuranguru pungkunyitjaku ngaranyi alatjitu. Palula-tawaraya miri pungkunyitja wiya, walytjatjara kutitjunkunyitja wiya, irarira wangkanyitja wiya, kura kutjupa kutjupa

uwankara palyantja wiyangku wantima.

16 Palu tjinguru nyuranya Jesunya wanannyangka anara pungkuku, ka nyura uti kuntaringkuwiya ngarama munuya alatji kulinma, “Munta-uwa, nganaṅa Jesunya wanannyangkaya nyangantu nganaṅanya kuraṅi.” Munu nyura uti tjananya kulilwiyangku wantira Godanya pulkara walkunma, panya paluru alatjitu nyuranya Jesuku walytjaringkunyjtaku ngurkantanu.

17 Palu kuwari nyanga Godalu anangu uwankara nyakula ngurkantananyi tjana kura munu palya nyinanytjitja-nguru. Munu paluru nganaṅanya palumpa walytja tjuṭa-warara nyanganyi kura palyantjitja-nguru ngurkantara paintjikitjangku. Palulangurula alatji kulini, “Munta, Godalu nganaṅanya-warara ngurkantankunyjtatjanungku anangu panya palunya wantipai tjuṭa ngurkantara pulkara paira iyalku ngura kurakutu, panya tjana Tjukurpa Palya Jesunyatjara kulira wantingi.” 18 Panya nyiringka iriti walkatjunkunyjtja ngaranyi nyanga alatji,

“Panya Godalawanu tjukaruru nyinapai tjuṭangkuya pika pulka mantjira kutju wankaringkuku.

Kaya anangu panya Godanya wantira kura palyalpai tjuṭa yaaltjiriku? Wiya, Godalu tjananya pulkara alatjitu pikantankuku ngaltjuringkunyjtja wiyangku.”

19 Uwa, nyanga alatji Godalu nyurala wangkanyi, panya tjituru-tjituru kutjupa

kutjupa tju_ta nyurala wirkankuku. Ka tjituru-tjituru nyanga paluru tjana wirkankunyangka nyura yaaltjiriku? Wiya, uti nyura Godaku mulamularingama wantinytja wiya, panya paluru nganannya palura tjunkunytjatjanungku titutjarangku atunymara kanyini. Paluru nganampa watarkurinytja wiya, kala uti mukulya tjukaruru nyinama nganana_la tjituru-tjituru nyanga paluru tjana wirkankunyangka.

5

Jesuku Walytjapiti Atunymankupai Tjutangka Wangkanytja

¹ Uwa, kana kuwari nyurala wangkanyi Jesuku walytjapiti atunymankupai tjutangka. Ngayulu kulu panya nyura purunypatu Jesuku walytja tju_ta atunymara kanyilpai nyinanyi. Ngayulu panya ngarala nyangangi Jesunya wakara punu katakutjarangka utitjunkunyangka, mununa ngula tjintu malatjangka ngayulu palula tjunguringkula pukulpa mulapa nyinaku, panya nyara palula-arangka Godalu palunya uwankarangka nintilku paluru witulya pulka mulapa ngaranyangka pitalytji pulkanya. Kana kuwari nyanga nyuranya wangkanyi Jesuku walytja tju_ta wirura atunymankunytjaku.

² Panya Godalu nyuranya tjunu tjananya atunymara kanyintjaku. Ka nyura uti kurunpa winki mukuringkula tjananya wanganarangku atunymara kanyinma. Panya wati tjapatangku palumpa tjiipi tju_ta wirura kanyilpai, palu

purunytju nyura uti Godaku walytja tjuṭa wirura atunymara kanyinma, panya Godanya mukuringanyi nyura alatji wirura kanyintjaku.

Palu tjanalanguru mani mantjintjikitjangku kulintja wiyangkuya wantima munuya Godaku tjukurpa tjanala pukultjungku nintinma tjanampa kutju palyantjikitjangku kulira.
³ Munu tjananya wirura purkarangku kanyinma pauntjingara wangkara wituwituntja wiyangku, panya Godalu nyuranya wirura kanyintjaku ngurkantanu. Ka paluru tjana nyuranya nyakula nyuranya purunypatu wirura nyinaku. ⁴ Ka nyara palulanguru ngula nyurampa tjpata pulkangku Christalu malaku pitjala nyuranya anangu winkingka mirangka mirawanira wiru mulapa ungkuku. Ka nyara paluru kuraringkunyitja wiya titutjara pitalytji pulka ngaraku wiru mulapa.

⁵ Kaṇa nyurala ngapartji wangkanyi wati yangupala tjuṭangka munu kungkawara tjuṭangka kulu. Uti nyura tjilpi pampa tjuṭangka wanganarangku kulinma tjana wangkanyangka.

Uwa, uti Jesuku walytja uwankara kaṇany-kaṇanypa wiya nyinama ngaltunytju pulka. Munuyanku pukultjungku ngapartji-ngapartjingku alpamilara palyanma, panya nyiringka iriti walkatjunkunyitja ngaranyi nyanga alatji,

“Panya Godalu kaṇany-kaṇanypa nyinapai tjuṭa wantipai.

Palu panya purkara nyinapai tjuṭa paluru mukulyangku atunymara kanyilpai

kaṅany-kaṅanypa wiya nyinanyangka.” *

6 Pala palulanguruya Godala aṭunymankupai pulkangka wanganarangku kulinma kaṅany-kaṅanyariwiyangku, ka ngula tjiṅtu paluru kulintjitjangka paluru nyuranya mirawanira pulka mulapa tjunkuku. 7 Palu nyurala kutjupa kutjupa kura wirkankunyangkaya tji-turu-tjitururinytja wiyangku Godanya kulinma, panya paluru nyuranya aṭunymara kanyini.

8 Munuya kulil-kulilpa nyinama mamu Satantu pikatjngku nyuranya kurara punkatjingantjaku-tawara. Panya mamu paluru lion pulka purunypa para-ngaranyi, panya lion pulkangku kuka para-ngurilpai patjara ngalkula paljtjaringkunyjtikitjangu, palu purunytju mamu paluru para-ngarala ngurini anangu tjuṭa kurara punkatjingantjikitjangu. 9 Kaya Godaku rawa raparingkula mamu pala palula tungunpungama. Munuya kulinma panya Jesuku walytja kutjupa tjuṭa manta winkingka nyuranya purunypa nyinanyi, panya Godanya wantipai tjuṭangkuya palunya tjananya munu nyuranya kulu Jesuku mulamularingkunyangka kurara punganyi munu pulkara pikantananyi. 10 Palu nyura pika nyanga palula tjanalawanu tjukutjuku rawa nyinanyangka Godalu witulya pulkangku nyuranya wiru mularmankuku munu nyuranya kurunpa rapa kunpu alatjitu palyalku nyura palumpa pulkara titutjara mulamularingkunyjtaku. Panya Godalu mukulya pulkangku nyuranya ngurkantanu nyura Jesula tjunguringkula ngura wirungka

* 5:5 Proverbs 3:34

tūtjara nyinanytjaku. ¹¹ Uwa, Godanya mayatja witulya pulka mulapa nyinanyi. Kala wanyu wantinytja wiyangku tūtjarangku palunya kutju mirawanira walkunma. Uwa, mulapa.

Tjukurpa Malatja

¹² Uwa, nyangatja ngayuku malpa wiru ini Tjaalatjanya ngayula tjungu nyinanyi. Paluru panya Jesunya tungun-tunguntu wanalpai wantinytja wiyangku. Kali paluru ngali lita nyangatja nyurampa mutumu wwalkatjunu nyuranya pukulmankunytjikitjangku. Nyangatjana wwalkatjunu nyura kulintjaku panya Godanya mulapa ngaltunytju pukultju pulka nganampa nyinanyi. Kaya nyanga palunya kulira Godaku rawa mulamularingama wantinytja wiya.

¹³ Kaya ngura nyanga Papilanta Jesuku walytja tjuťangku nyuranya kulini nyurampa pukularira.* Panya nyanga palunya tjananya Godalu ngurkantanu nyuranya purunypa paluru tjana kulu Jesuku walytjaringkunytjaku.

Ka wati kutjupa Markanya kulu mukuringanyi ngayulu palumpa wangka nyurala tjakultjunkunytjaku. Wati nyanga paluru panya ngayuku katja purunypa.

¹⁴ Ka nyura uti anangu kutjupa Jesuku walytja nyakulampa palumpa pukularira mara witinma.

* **5:13** Ngura Papilangga kunyu ngura Rome-anya, panya kutjupa-ara anangu tjuťangku ngura Rome-anya kitikiti wangkanytjikitjangku ini Papilangga wangkapai.

Uwa, alatjitu_{na} wangkanyi. Ka Godalu nyuranya Christaku walytjapiti uwankara kurunpa pukulpa rapa mulapa palyanma.

Tjukurpa Palya
Portions of the Holy Bible in the Pitjantjatjara
language of Australia

copyright © 2019 Bible Society of Australia

Language: Pitjantjatjara

Translation by: The Pitjantjatjara Bible Translation Project, Wycliffe Bible Translators and Bible Society Australia.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-04-23

PDF generated using Haiola and XeLaTeX on 11 Nov 2022 from source files dated 22 Nov 2019

b29b7786-0954-5b75-82cb-3657182b63d6